

SEGUNDA CARTA DEL APOSTOL SAN PABLO A LOS CORINTIOS

1 ¹Che co jae Pablo. Che co jae Jesucristo jemimondo Tumpa jemimbota rupi. Ñanderivi Timoteo vi oime cuae pe oi che ndive. Aicuatía cuae tupapire opaete peporogüirovia vae Corinto pe peñemboati vae reta pe, jare opaete iru oñeñoño tee Tumpa peguara vae opaete Acaya rupi ñogüinoi vae reta pe. ²ÑandeRu Tumpa jare ñandeYa Jesucristo tomee peve ipiacavi jare ipiacatu.

Pablo oiporara

³Ñamboete Tumpa. Jae co ñandeYa Jesucristo Tu. Jae co ñandeRu vi. Jae ñandeparareco. Jae jecuaeño ñanembopiacatu. ⁴Echa jae jecuaeño ñanembopiacatu yaiporara yave, ñandepuere vaera ñambopiacatu iru oiporara ñogüinoi vae reta. Echa jocorai vi Tumpa ñanembopiacatu. ⁵Echa yaiporara yae yave Cristo re yarovia rambue, ñandepiacatu yae vi Cristo rupi. ⁶Jare ore roiporara yave, roiporara co pe reta penoi vaera mbiacatu jare ñemboasa. Jare Tumpa ñanembopiacatu yave, jocorai oyapo pe reta penoi vaera mbiacatu jare ñemboasa. Jare jocorai pepuere pemoaguata pepiaguasu reve peiporara yave ore roiporara rami. ⁷Jare jecuaeño rogüirovia catu peré pemoaguata vaera. Echa roicuaa quirai pe reta vi peiporara ore roiporara rami. Jae ramiño vi roicuaa quirai Tumpa pembopiacatu orembopiacatu rami.

⁸Echa roipota peicuaa vaera, cherivi reta, quirai roiporara Asia pe roi yave. Roiporara yae. Ayete mbaeti orepuere romoaguata. Jae rambue roñemongueta tei romanota co. ⁹Añete co, roñemongueta tei Tumpa omaeñota co oreré romano vaera. Erei jocorai Tumpa oicuauca oreve mbaeti co orepuere royeco orembaepuere ae re, jaeño orepuere royeco Tumpa re. Echa Tumpa ipuere omoingove ye omanogüe vae reta. ¹⁰Echa jae orerepi romano seri yave, jare jecuae orerepi mano güi. Jae ramiño vi rogüirovia orerepi yeta co. ¹¹Pe reta vi pepuere orembori. Echa pepuere peyerure Tumpa pe oreré. Jare jocorai

yave, jeta vae omeeta yasoropai Tumpa pe jae oyapota oreve vae re. Echa Tumpa oyapota co oreve, jeta vae oyerureta chupe oreré rambue.

Maera Pablo oipota ojo Corinto pe

¹²Echa ore roico cavi oporogüirovia mbae vae reta ipite pe jare pepite pe etei, Tumpa orembori rambue. Mbaeti etei roporombotavi. Jare corai roico Tumpa ipiacavi rupi, mbaeti orearacuaa ae rupi. Jare roicuaa cuae añete co. Jae rambue royerovia. ¹³Echa pemongueta ramiño roicuatía peve. Jare pepuere peicuaa cavi roicuatía peve vae. Jare aipota jecuaño peicuaa cavi vaera. ¹⁴Añete co, amogüe pe reta oredua cavi ma. Echa pe reta peyerovia oreré. Jae ramiño vi ore royeroviata peré ñandeYa Jesús iara pe.

¹⁵Jare cuae aicuaa cavi rambue, aipota tei aja rani pepiri, che pomboyerovia vaera tei mócoi vese. ¹⁶Echa aipota tei apou pepiri Macedonia pe ayu yave, jare apou ye pepiri Macedonia güi aja yave, pe reta pepuere vaera chembori aja ye yave perenta güi Judea coti. ¹⁷Jare añemongueta yave jocorai ayapo vaera, mbaeti etei añemonguetaiño jese. Echa añemongueta yave mbae ayapo vaera, mbaeti etei añemongueta cheremimbota reño. Che jae yave: “Ayapota co”, mbaeti jae voi ye: “Mbaetita ayapo”. ¹⁸Tumpa vi oicuaa quirai ore roe yave: “Royapota co”, mbaeti roe voi ye: “Mbaetita royapo”. ¹⁹Echa Tumpa Tai - jae co Cristo Jesús - che jare Silvano jare Timoteo romombeu peve vae jei yave: “Ayapota co”, mbaeti jei voi ye: “Mbaetita ayapo”. Jaeño jae jei: “Ayapota co”. ²⁰Echa opaete Tumpa güirocuavee vae Cristo oyapota co. Jae rambue orepuere roe: “Amén”, Tumpa pe Cristo rupi, jare jocorai romboete Tumpa. ²¹Jare Tumpa oremomirata Cristo re jare oreño tee royapo vaera iparaviqui. Jae ramiño vi Tumpa pemomirata. ²²Jare Tumpa ome ma ñandeve Espíritu Santo, oicuaa vaera ñande jae imbae co, jare Espíritu Santo ñandepia pe oico rambue, yaicuaa jeta yae co Tumpa omeeta ñandeve.

²³Jare ndeiño aja Corinto pe agüiye vaera añeengata peve. Tumpa oicuaa cuae amombeu peve vae añete co. ²⁴Mbaeti etei rogüinoi mbaepuere peporogüirovia re. Echa pepirata ma peporogüirovia re. Jaeño roipota pombori, pe reta peyerovia vaera.

2 ¹Jae rambue che jae cheyeupe ngaraa aja ye pepiri chepiatiti reve. ²Echa che pombopiatiti yave, ¿quia ra co chemboyeroviata? Pe reta co. Erei che pombopiatitita tei, aja pepiri yave. ³Jae rambue aicuatía peve, agüiye vaera pe reta chemboyerovia vaeragüe chembopiatiti, aja pepiri yave. Echa che arovia che ayerovia yave, pe reta vi peyeroviata co. ⁴Echa aicuatía peve ayaeo yae reve, chepiatiti yae rambue. Añandu yae chepia pe. Mbaeti aipota pepiatiti vaera. Erei aipota peicuaa vaera quirai tuicha yae co cheporoaiu pecoti.

Peiro icavi mbae vae oyapo vae pe

⁵Jocuae iyoa vae mbaeti cheño chembopiatiti. Opaete seri pe reta vi pembopiatiti. Corai che jae peve, agüiye vaera amboeco yae. ⁶Jeta pe reta peiporarauca ma chupe. Jae rambue agüiye mo peiporarauca ye chupe. ⁷Añave icavi co peiro vaera chupe. Icavi co añave pembopiatitu vaera. Agüiye mo peiporarauca ye chupe. Echa peiporarauca ye yave chupe, güiramoi oyapota mbae icavi mbae vae, ipiatiti yae rambue. ⁸Jae rambue che pomañera pemombeu vaera chupe quirai jecuae co peaiu. ⁹Echa cuae jeco pegua aicuatía peve, aicuaa vaera mbae ra peyapota. Aipota aicuaa peyapota ra opaete che jae peve peyapo vaera vae. ¹⁰Pe reta peiro yave quia pe mbae re, che vi cheiro chupe jese. Echa jocuae cheiro quia pe jese vae, oime yave mbae cheiro vaera quia pe jese vae, cheiro co chupe jese pereco pegua Cristo jóvai. ¹¹Mbaeti yaipota Satanás ñanemoamiri vaera. Echa yaicuaa cavi co mbae jae oipota oyapo vae.

Pablo oñemambeco Troas pe

¹²Jare che aja avae yave Troas pe amombeu vaera ñee icavi vae Cristo regua, yepe tei ñandeYa ome cheve aparaviquí cavi vaera chupe, ¹³erei mbaeti etei chepiacatu, mbaeti avae joco pe ñanderivi Tito rambue. Jae rambue che jae Troas pegua reta pe aja yeta co, jare ayu chugüi reta Macedonia coti.

Ñaporomoamiri Cristo rupi

¹⁴Yasoropai romee Tumpa pe. Echa jae jecuaeño orembori roporomoamiri vaera Cristo rupi, jare ome oreve roicuauca vaera opaete que rupi, mbae ipiche cavi vae oñeetu opaete que rupi rami. ¹⁵Romombeu yave iru vae reta pe Cristo regua, romboyerovia Tumpa, mbae ipiche cavi vae ñanemboyerovia rami. Jare romombeu oñemboasauca vae reta pe jare ocañiteita vae reta pe, mbae ipiche cavi vae oñeetu opaete que rupi vae rami. ¹⁶Echa romombeu yave ocañiteita vae reta pe, mbae ipiche cavi vae amojaanga oreré vae oyeapo mbayachi quia oporoyuca pipe vae rami. Jae ramiño vi romombeu yave oñemboasauca vae reta pe, jae oyeapo mbae tecove ome vae rami. Jare mbaeti quia ipuere jaeiño oyapo cuae mbaraviquí. ¹⁷Echa jeta vae oiporu Tumpa iñee omongana vaera mbaembae iyeupeguara. Erei ore mbaeti co jae reta rami. Ore romombeu cavi Tumpa iñee Tumpa oreócuai romombeu vaera rami. Oremiari Tumpa jovaque Cristo re rogüirovia rambue.

Morogüirocuavee ipiau vae

3 ¹Güiramoi pe reta peñemongueta tei ore romboipi ye roñemboete. Mbaeti co jorai. Mbaeti ndipo peipota rogüeru vaera peve tupapire reta roicuauca vaera peve quia co ore. Mbaeti ndipo peipota pemee oreve

tupapire reta roicuauca vaera iru vae reta pe quia co ore. Echa iru vae reta güinoi jocuae nunga tupapire. ²Mbaeti co roñemboete. Echa pe reta co jae oretupapire oyecuatía oi orepia pe vae rami. Opaete vae ipuere perecha oicuaa vaera quia co ore, metei tupapire ipuere omongueta rami. ³Echa opaete vae ipuere oicuaa quirai pe reta co jae metei tupapire Cristo güi ore rogüeru vae rami. Erei pe reta co metei tupapire Tumpa jecuaeño oico vae iEspíritu pe oyecuatiauca vae rami, mbaeti co metei tupapire tinta pe oyecuatía vae rami. Tumpa oicuatía ñee pepia re etei. Mbaeti oicuatía ita reta re.

⁴Jare corai orepuere roe peve, rogüirovia catu Tumpa Cristo rupi rambue. ⁵Oreño mbaeti etei orepuere mbae royapo. Erei Tumpa omee oreve imbaepuere. ⁶Jae ramiño vi Tumpa omee oreve mbaepuere, royeócuai cavi vaera chupe morogüirocuavee ipiau vae re. Cuae morogüirocuavee ipiau vae Espíritu pegua co, mbaeti co mboroócuai oyecuatía oi vae pegua. Echa mboroócuai oyecuatía oi vae jei mbaeti jeigüe oyapo vae omanota co. Erei Espíritu Santo omee ñandeve tecove opa mbae vae.

⁷Jocuae mboroócuai oyecuatía oi ita reta re vae oñemee Moisés pe yave, Tumpa oesape yae Moisés írambue. Jae rambue Israel pegua reta mbaeti ipuere omae ngatu Moisés jova re. Echa Moisés jova vi oesape yae. Yepe tei mboroócuai jei mbaeti jeigüe oyapo vae omanota co, erei oñemee Moisés jova oesape yae reve. Erei jocuae oesape vae mbaeti ima oico. ⁸Jae rambue jeta yae maemboete güinoi jocuae güi ñee Espíritu Santo güeru ñandeve vae. ⁹Echa yepe tei mboroócuai jei mbaeti jeigüe oyapo vae omanota co, erei güinoise maemboete. Jae rambue güinoi ma jeta yae maemboete jocuae güi ñee oicuauca ñandeve Tumpa ñanembojupi co vae. ¹⁰Echa tenonde yave Tumpa omboeteuca mboroócuai. Erei ocañi ma mboroócuai imaemboete. Echa cuae añave Tumpa omboeteuca ma vae jeta yae maemboete güinoi chugüi. ¹¹Echa jocuae mboroócuai ita reta re oyecuatía vae güinoise maemboete, yepe tei oñemboai ma. Jae rambue jocuae jecuaeño oico vae jeta yae maemboete güinoi.

¹²Jare cuae rogüirovia rambue, romombeu cavi peve opaete. ¹³Mbaeti royapo Moisés oyapo rami. Echa jae oyaso jova metei tarapo pe, agüiye vaera Israel pegua reta omae ngatu jova re. Echa mbaeti oipota Israel pegua reta oecha vaera quirai ogüe jocuae jova re oesape vae. ¹⁴Erei Israel pegua reta mbaeti oicuaa cavi. Echa jecuaeño inñemongueta oyeasoi oi, Moisés jova tarapo pe oyeasoi rami. Jae rambue mbaeti oicuaa cavi, morogüirocuavee indechi vae omongueta yave. Erei jocuae morogüirocuavee indechi vae Cristo omboai ma. ¹⁵Erei Moisés oicuatía vae omongueta yave, jecuaeño oime oi jocuae inñemongueta iyasoia. ¹⁶Erei ñandeYa coti oyerova yave, oyeequita jocuae inñemongueta iyasoia. ¹⁷Jare ñandeYa oyovaque Espíritu Santo ndive. Jare oime yave quia güinoi ñandeYa iEspíritu vae, ipuere oñemongueta cavi. ¹⁸Jare ñande mbaeti co jova oyaso vae rami. Jae rambue ñande co jae metei yeechaca rami. Echa iru vae reta ipuere oecha ñandeYa güi oesape vae ñanderova re. Jare ñamae ngatu ñandeYa re rambue, jecuaeño ñandeYa iEspíritu oparaviqui ñandepia pe, ñai vaera ñandeYa rami.

4 ¹Jae rambue mbaeti orecuérai. Echa Tumpa oreparareco jare omee oreve royeócuai vaera chupe. ²Mbaeti etei royapo iru vae reta oyapo viari imara rambue vae. Mbaeti etei mbae royapo roporombotavi vaera. Mbaeti vi rogüirova Tumpa iñee. Jaeño romombeu iru vae reta pe añete vae, jare jororai opaete vae ipuere oicuaa quirai ore roico cavi Tumpa jovaque. ³Amogüe vae jei mbaeti ipuere oicuaa cavi ñee icavi vae ore romombeu vae. Erei jororai jei, jae reta ocañiteita rambue. ⁴Echa jae reta mbaeti güirovia Tumpa. Jae rambue cuae ivi pegua reta iya omopitumimbi iñemongueta, agüiye vaera oicuaa cavi ñee icavi vae Cristo oñemboete yae vae regua. Cristo co jae Tumpa etei cuimbaera oyeapo vae. Echa ñee icavi vae metei tembipe ñanemboesape vae rami co. ⁵Ore roñemoñee yave, romombeu ñandeYa Cristo Jesús, mbaeti oremiari oreyee. Echa ore co jae perembiócuai retaño, Jesús roaiu rambue. ⁶Echa opaete pitumimbi yave, Tumpa jei tove toi tembipe. Jae ramiño vi Tumpa omboesape orepia pe metei tembipe rami, roicuaa vaera quirai jae oñemboeteuca yae. Tumpa imaemboete oyecuaa Jesucristo rupi.

Mborogüirovia rupi yaico

⁷Jare cuae icavi yae vae oime Tumpa güi rogüinoi vae oico orerete pe, yepe tei orerete ivi pegua co, oyecuaa vaera cuae mbaepuere tuicha yae vae oime rogüinoi vae Tumpa imbaepuere co, mbaeti co orembaepuere aeño. ⁸Opaete que rupi roiporara, erei jecuaeño orepuere roparaviqui Tumpa pe. Mbaeti roicuaa mbae royapo vaera, erei jecuaeño Tumpa oicuauca oreve. ⁹Iru vae reta oyapo icavi mbae vae oreve, erei jecuaeño Tumpa oime oi ore ndive. Romano seri, erei jecuaeño Tumpa omee oreve tecove. ¹⁰Opaete que rupi mbaeti roquiye romano vaera Jesús omano rami, oyecuaa vaera orerete re tecove Jesús oime güinoi vae. ¹¹Echa yepe tei oime roi viteri, erei jecuaeño mbaeti roquiye romano vaera Jesús roaiu rambue, oyecuaa vaera orerete omanota vae re tecove Jesús oime güinoi vae. ¹²Jae rambue jecuaeño roiporara yae roico, pe reta penoi vaera tecove opa mbae vae.

¹³Oreporogüirovia oyovaque co jocuae mborogüirovia ñamongueta jese vae ndive. Echa Tumpa iñee pe oyecuatía oi corai: “Che arovia. Jae rambue chemiari jese”. Jororai oyecuatía oi. Jae ramiño vi ore rogüirovia. Jae rambue oremiari jese. ¹⁴Jae roicuaa Tumpa omoingove ye co ñandeYa Jesús güeru omanogüe vae reta ipite güi. Jae ramiño vi roicuaa Tumpa oremoingove yeta co orereru omanogüe vae reta ipite güi roico vaera Jesús ndive, jare oreñonota pe reta ndive jae jóvai. ¹⁵Echa opaete roiporara, orepuere vaera pombori, jare Tumpa ipiacavi oi vaera jeta vae ndive. Echa jororai yave, jeta vae omeeta yasoropai Tumpa pe, jare jororai Tumpa oñemboeteucata.

¹⁶Jae rambue mbaeti orecuérai. Echa yepe tei orerete pe jecuaeño roiporara, erei Tumpa jecuaeño omee oreve imbaepuere. ¹⁷Echa yaiporara vae michi yae jare michi peguaño co. Jare yaiporara yave, Tumpa omeeta ñandever maemboete tuicha yae vae ngaraa etei opa vae. ¹⁸Jae rambue mbaeti ñañemongueta mbaembae ñandepuere yaecha vae re. Ñañemongueta mbaembae mbaeti

ñandepuere yaecha vae re. Echa mbaembae ñandepuere yaecha vae opata co. Erei mbaembae mbaeti ñandepuere yaecha vae ngaraa etei opa.

5 ¹Echa yaicuaa ñanderete omanota co. Jae co metei o mbaeti ima oico vae rami. Erei Tumpa omeeta ñandeve ñanderete ipiau vae. Jae co metei o Tumpa oyapo vae rami. Jare cuae Tumpa omeeta ñandeve vae ara pegua co, mbaeti co ivi pegua, jare ngaraa etei opa. ²Echa cuae ñanderete pe yaico rambueve, yaiporara, jare yaipota yae ñanoi ñanderete ipiau vae metei o Tumpa oyapo vae rami. ³Jare Tumpa omee yave ñandeve ñanderete ipiau vae, ngaraa etei ñai ñanderete mbae reve. ⁴Echa cuae ñanderete pe yaico rambueve, yaiporara co, yavai yae ñandeve rambue. Erei mbaeti yaipota ñai ñanderete mbae reve. Yaipota ñanoi ñanderete ipiau vae, ñanoi vaera tecove opa mbae vae, agüiye vaera ñamano. ⁵Jare cuera Tumpa oparaviqui ñandepia pe, jare omee ma ñandeve Espíritu Santo oicuauca vaera ñandeve jocuae omeeta ñandeve vae.

⁶Jae rambue jecuaeño yayerovia. Echa yaicuaa cuae ivi pe yaico rambueve, mbaeti ñai ñandeYa piri. ⁷Echa yaico ñandeYa re ñandeporogüirovia reve. Erei ndeño yaecha. ⁸Erei jecuaeño yayerovia. Jare ñanequirei yaeya ñanderete, ñai vaera ñandeYa piri. ⁹Jae rambue jecuaeño yaipota ñamboyerovia ñandeYa cuae ivi pe yaico rambueve jare ipiri ñai yave. ¹⁰Echa opaete vae ñaita Cristo jóvai, jae ñaneraa vaera. Jare Cristo omboecoviata metei ñavo pe cuae ivi pe oico rambueve oyapo vae. Jae omboecoviata icavi vae oyapo vae jare icavi mbae vae oyapo vae pe.

Omombeu quirai ñañembopiacatu Tumpa ndive

¹¹Jae rambue ore roparaviqui iru vae reta güirovia vaera ñandeYa re. Echa roicuaa ñandeYa oreraata co. Erei Tumpa oicuaa maera royapo opaete royapo vae. Jae ramiño vi aipota pe reta peicuaa vaera cuae. ¹²Mbaeti co roe peve cuae roñemboete vaera. Erei roipota pe reta peicuaa vaera cuae, pepuere vaera oremboete. Echa jorai yave, pepuereta pemiari cuae re iru vae reta pe, jae reta oñemboete yave. Echa jae reta oñemboete mbae icatu pe oyecuaa vae re. Oñemboeteta tei co ipia pe güinoi vae re. ¹³Güiramoi iru vae reta jeita oremboquere co. Erei jaeño roipota romboete Tumpa. Erei jei reta yave ore orearacuaa co, icavi co peve. ¹⁴Echa Cristo oreraiu rambue, orequirei yae royeócuai chupe. Echa roicuaa cavi Cristo omano opaete ñanderé. Jae rambue opaete ñande vi ñamano ñaneremimbota ae güi. ¹⁵Jae Cristo omano opaete vae re, ñande jecuaeño yayeócuai vaera chupe yaico rambueve cuae ivi pe, agüiye vaera yaico ñaneremimbota reño. Echa Cristo omano ñanderé jare oicove ye ou omanogüe vae reta ipite güi. ¹⁶Jae rambue añave güiye ngaraa ñañemongueta iru vae re jae co ivi peguaño. Yepe tei yaicuaa quirai Cristo oico cuae ivi pe, erei añave güiye ngaraa ñañemongueta jese jocuae re. ¹⁷Jae rambue oime yave quia güirovia Cristo re vae, Tumpa omee chupe tecove ipiau vae. Mbaeti ma oipota mbaembae tenonde yave oipota vae. Oipota ma mbaembae tecove ipiau vae pegua.

¹⁸Jare Tumpa oyapo opaete cuae. Jare jae ñanembopiacatu jae ndive Cristo rupi, jare omeë ñandëve ñamombeu vaera iru vae reta pe quirai jae oipota ombopiacatu reta jae ndive. ¹⁹Cuae oipota jei Tumpa ombopiacatu jae ndive opaete ivi pegua reta Cristo rupi, agüiye vaera omboeco reta imbaeyoa reta re. Jare Tumpa omeë ñandëve ñamombeu vaera iru vae reta pe quirai oipota ombopiacatu reta jae ndive. ²⁰Jae rambue Cristo ñanemondo jae jecovia pe. Jare ñanemiari yave, jae co Tumpa imiari oi ñande rupi. Echa Tumpa oipota ombopiacatu iru vae reta jae ndive. Jae rambue ñande ñamoñera yae iru vae reta Cristo jee re oñembopiacatu vaera Tumpa ndive. ²¹Cristo mbaeti etei iyoa. Erei Tumpa oiporarauca chupe opaete ñanembaeyoa re, Tumpa ipuere vaera ñanembojupi yarovia Cristo re yave.

6 ¹Ore roparaviqui Tumpa ndive. Jae rambue ore pomonera agüiye vaera peñuvanga Tumpa ipiacavi re. ²Echa Tumpa jei iñee oyecuatía oi vae pe corai:

Chepiacavi rambue, ayeapisaca nderé.

Che roepi jocuae ara reñemboasauca yave.

Jocorai jei. Mase, añave Tumpa ipiacavi. Añave co ara ñemboasa pegua.

³Jecuaeño roico cavi, agüiye vaera quia romboavai. Jocorai roico, agüiye vaera iru vae reta jei: “Jocuae Tumpa jembíocuai reta oyapo icavi mbae vae”.

⁴Jecuaeño roipota roicuauca iru vae reta pe quirai royeócuai cavi Tumpa pe. Echa orepiaguasu yae. Roiporara yae. Jecuaeño oata mbaembae oreve. Yavai co oi roico vaera. ⁵Iru vae reta orenupa jare oreñoño tembipiiriru pe. Iru vae reta oyapo tecorai oreré. Tanta roparaviqui. Amo pe mbaeti orepuere roque. Amo pe mbaeti orerembiura. ⁶Mbaeti mbae pochii vae royapo iru vae reta coti. Roicuauca añete vae iru vae reta pe. Romoaguata iru vae reta oyapo icavi mbae vae oreve yave. Orepiacavi iru vae reta pe. Jecuaeño Espíritu Santo orembori. Añetete roaiü iru vae reta. ⁷Romombeu iru vae reta pe ñee añete vae, jare Tumpa orembori imbaepuere pe. Jecuaeño royapo jupi vae, amogüe vae güirovia vaera Cristo re, jare agüiye vaera iru vae reta ipuere oremboeco mbae re. ⁸Amogüe vae oremboete, jare amogüe vae orereroiro. Amogüe vae jei mbaembae icavi vae oreré, jare amogüe vae jei mbaembae icavi mbae vae oreré. Yepe tei iru vae reta jei ore co jae oporombotavi vae reta, jecuaeño roe añete vae. ⁹Iru vae reta mbaeti orecuaa. Erei Tumpa orecuaa cavi. Romano seri aveiño, erei jecuaeño roi. Iru vae reta orenupa, erei ndeiño oreyuca. ¹⁰Orepiatiti, erei jecuaeño royerovia. Oreparavete, erei jeta iru vae reta güirovia Cristo re ore rupi. Mbovi yae mbaembae ivi pegua rogüinoi, erei oime rogüinoi jeta yae Tumpa omeë oreve vae.

¹¹Romosimbi oremiari peve, Corinto pegua reta. Peicuaa ma quirai ore poaiü yae. ¹²Mbaeti yave yayoaiü, ore mbaeti rogüinoi teco. Pe reta co penoi teco. ¹³Tachemiari peve metei tu imiari imichia reta pe rami. Ore poaiü rambue, pe reta vi peicuauca oreve quirai pe reta oreraiü.

Agüiye peñemoiru oporogüirovia mbae vae reta ndive

¹⁴Agüiye peñemoiru oporogüirovia mbae vae reta ndive. Echa oporogüirovia mbae vae reta ñemongueta mbaeti oyovaque oporogüirovia vae reta ñemongueta ndive. Echa jupi vae mbaeti etei oyovaque jupi mbae vae ndive. Jae ramiño vi tembipe jare pitumimbi mbaeti etei ipuere yogüireco pave. ¹⁵Cristo mbaeti etei oñemoiru Satanás ndive. Jae ramiño vi oporogüirovia vae mbaeti oico oporogüirovia mbae vae oico rami. ¹⁶Mbaeti etei icavi tumpa-raanga reta ñogüinoi vaera Tumpa oicoa pe. Jare pe reta co jae Tumpa oicoa rami. Echa Tumpa jei corai:

Aicota jare aguatata ipite rupi.

Aicota jae reta iTumpara, jare jae reta yogüirecota chembaera.

Jocorai jei Tumpa jecuaeño oico vae. ¹⁷Jae rambue jae jei ye peve corai:

Jae rambue pesiri icavi mbae vae oyapo vae reta ipite güi.

Agüiye ye mo peñemoiru jae reta ndive.

Agüiye peyapo icavi mbae vae jae reta oyapo rami.

Jare che pomboresiveta.

¹⁸Jare che aicota peRura,

jare pe reta peicota cheraira jare cherayira.

Jocorai jei ñandeYa opaete mbaepuere güinoi vae.

7 ¹Tumpa omeë ma ñandeve opaete cuae morogüirocuavee reta. Jae rambue, cherivi reta, aicutía peve corai: Agüiye mo yayapo icavi mbae vae ñanderete pegua jare ñanderecove pegua. Jecuaeño ñañeño tee Tumpa peguara yaquiye reve Tumpa güi.

Pablo oyerovia Corinto pegua reta oyapo vae re

²Peicuauca oreve quirai co oreraiu. Ore mbaeti etei royapo mbae icavi mbae vae oipotagüe vae pe. Jae ramiño vi mbaeti etei royapouca mbae icavi mbae vae oipotagüe vae pe. Mbaeti etei roporombotavi. ³Mbaeti jae peve cuae pomboeco vaera. Echa che jae ma peve quirai ore poaiu yae. Jae rambue ñamano yave ani jecuae yaico yave, mbaetita mbae ipuere oequi cuae mboroiu orepiã güi. ⁴Amosimbi chemiari peve, jare iru vae reta pe chemiari yave ayerovia yae peré. Yepe tei roiporara yae roi, Tumpa jecuaeño chembopiacatu jare ayerovia yae.

⁵Macedonia pe royu rovae güive, mbaeti etei orepuere roputuu opaete roiporara vae güi. Iru vae reta oyovaicho ore ndive oremonguiye vaera. ⁶Erei Tumpa ombopiacatu ipiatiti vae reta. Jae rambue jae orembopiacatu Tito ou yave ovae orepiri. ⁷Jare mbaeti orepiacatu Tito ou ovae orepiri vae reño. Orepiacatu yae vi roicuaa yave quirai pe reta pembopiacatu Tito. Echa jae omombeu oreve quirai pe reta peipota yae cherecha, jare quirai pepiatiti yae jocuae oyeapo vae re, jare quirai peipota yae chemboyerovia. Jae rambue che ayerovia yae peré.

⁸Aicuaa yave quirai che pombopiatiti aicutía peve vae pe, che vi chepiatiti, yepe tei mbovi ara rupiño pepiatiti. Erei añave mbaeti chepiatiti, yepe tei che pombopiatiti aicutía peve vae pe. ⁹Añave ayerovia. Erei mbaeti ayerovia pepiatiti rambueño. Echa pepiatiti rambue, peeya peñemongueta icavi mbae vae pepia pe oi vae. Jare cuae jeco pegua ayerovia ma. Echa mbiatiti penoi vae icavi Tumpa pe. Jae rambue ore mbaeti co mbae icavi mbae vae royapo peve. ¹⁰Echa mbiatiti ñanoi vae icavi yave Tumpa pe, yaeya ñaneñemongueta icavi mbae vae ñandepia pe oi vae, jare Tumpa ñanderepi. Jare cuae re ngaraa ñandepiatiti. Erei ñandepiatiti yave oporogüirovia mbae vae reta ipiatiti rami, Tumpa mbaetita tei ñanderepi. ¹¹Echa peicuaa ma quirai peñemoatangua yae Tumpa coti, mbiatiti penoi vae icavi Tumpa pe rambue. Echa peipota yae peicuaa cheve pe reta mbaeti co penoi teco. Pepochi jocuae mbaeyoa re, jare pequiye vi jese. Peipota yae cherecha. Peipota yae vi peyapo che amombeu peve peyapo vaera vae. Echa peipota peiporarauca icavi mbae vae oyapo vae pe. Aicuaa ma quirai mbaeti etei teco penoi cuae oyeapo vae re. ¹²Aicutía peve yave, mbaeti aicutía icavi mbae vae oyapo vae jeco peguaño, jare mbaeti vi icavi mbae vae oyeapo chupe vae jeco peguaño. Erei aicutía peve peicuaa vaera quirai pe reta oreraü yae co Tumpa jovaque. Echa corai Tumpa oñemboeteucata co. ¹³Jae rambue Tumpa orembopiacatu ma. Jare royerovia yae Tito oyerovia peré vae re. Jare jorai Tumpa orembopiacatu. Echa pe reta pemboyerovia Tito. ¹⁴Echa chemiari cavi Tito pe peré, jare mbaeti chemara jocuae re. Opaete roe peve vae añete co. Jae ramiño vi Tito oicuaa ma añete co jocuae che jae chupe peré vae. Echa chemiari cavi chupe peré. ¹⁵Jae Tito peraü yae ma. Echa imaendúa quirai peyapo jae jei peve peyapo vaera vae, jare quirai pemboresive cavi pequiye reve jare peñemomichi reve. ¹⁶Jae rambue ayerovia peré. Echa opaete pe chepuere pogüirovia catu.

Corepoti omboati oporombori vaera

8 ¹Añave aipota aicuaa peve quirai oporogüirovia vae Macedonia pe oñemboatiati vae reta oicuaa Tumpa ipiacavi oñemee chupe reta vae. ²Echa oiporara rambue, yavai yae chupe reta. Erei oyerovia yae. Jare yepe tei paravete yae reta, erei jeta yae omeë, ombori vaera iru oporogüirovia vae reta. ³Chepuere amombeu peve quirai jae reta omeë che añemongueta icavi co omeë vaera vae. Añete co, omeë reta jeta yae che añemongueta icavi co omeë vaera vae güi. Jare omeë reta che ayócuai mbae reve. ⁴Jae oyerure yae oreve romboresive vaera jocuae oipota omeë vae, jorai ipuere vaera ombori iru oñeño tee Tumpa peguara vae reta. ⁵Jae oyapo reta jeta yae ore roñemongueta oyapota vae güi. Echa oñemee reta ñandeYa pe oyeócuai vaera. Jayave oñemee reta oreve vi, orembori vaera Tumpa jemimbota rupi. ⁶Jae rambue romoñera Tito opa vaera omboati pe reta pemeeta pepiacavi jeco pegua vae. Echa jae etei omboipi omboati. ⁷Peporogüirovia tuicha yae co. Icavi yae peporomboe. Jeta mbaembae peicuaa. Peratangatu yae jare oreraü yae. Opaete cuae peyapo cavi yae. Jae rambue peicuaa vi quirai pepiacavi yae cuae pemeeta vae re.

⁸Cuae che jae peve vae mbaeti co metei mboroócuai. Erei chemiari peve corai iru vae reta oipota omee ombori vaera iru oporogüirovia vae reta rambue, jare corai peyapo yave, peicuaucata peporoaiü añetete co. ⁹Peicuaa cavi co quirai ñandeYa Jesucristo oicuauca ipiacavi. Echa yepe tei jae oicocatu yae, erei oñemombaravete ñanderaiü rambue, ñande yaicocatu vaera Tumpa coti.

¹⁰Che pomboaracuaa cuae re corai: Icavi co peyapo vaera cuae. Echa metei año ma pe reta peñemongueta güire peporombori vaera, jare pemboipi pemboati pemee vaera. ¹¹Jae rambue añave jcorai peyapo. Echa cue año pe peipota peyapo cuae. Jae rambue añave opa peyapo cue año pe peipota peyapo vae. Pemee jocuae penoi vae güi, pembori vaera iru oporogüirovia vae reta. ¹²Echa yaipota yave ñamee ñanequírei reve, Tumpa oipota ñamee vaera oime ñanoi vae rupi. Tumpa mbaeti co oipota ñamee vaera mbaeti yave ñanoi ñamee vaera.

¹³Echa mbaeti etei aipota peñemombaravete yae vaera iru vae reta yogüireco cavi vaera. ¹⁴Erei aipota opaete vae oyovaque yogüireco vaera. Añave pe reta pepuere pemee mbovi jeta penoi vae güi pembori vaera mbaembae oata chupe vae reta. Jae ramiño vi jae reta jeta güinoi yave jare mbaembae oata peve yave, jae reta ipuereta omee peve mbovi jeta güinoita vae güi. Jae rambue jcorai opaete vae oyovaque yogüirecota. ¹⁵Echa Tumpa iñee pe oyecuatía oi corai: “Jocuae jeta güinoi vae mbaeti mbae oasa güinoi, jare jocuae mboviño güinoi vae pe mbaeti mbae oata”. Jcorai oyecuatía oi.

Tito jare iñeiru reta

¹⁶Erei amee yasoropai Tumpa pe quirai jae omoatangatu Tito pecoti, oremoatangatu pecoti rami. ¹⁷Echa Tito oipota oyapo ore roipota oyapo vaera vae. Erei jatangatu yae pecoti rambue, jaeiño iquírei ojo pepiri.

¹⁸Jare romondo jae jupíe orerivi opaete oporogüirovia vae oñemboatiati vae reta pe oñemboeteuca vae. Echa jae omombeu cavi ñee icavi vae. ¹⁹Jare mbaeti cuae jeco peguaño. Echa oporogüirovia vae oñemboatiati vae reta oiparavo, jae ojo vaera orerupíe orembori vaera cuae mbaraviqui mbiacavi pegua re. Cuae mbaraviqui royapo romboeteuca vaera ñandeYa jare roicuauca vaera quirai roipota yae roporombori. ²⁰Corai roipota royapo, agüiye vaera quia oremboeco cuae jeta corepoti romboati opaete que rupi romee vaera paravete vae reta pe vae re. ²¹Jecuaeño roipota royapo jupi vae iru vae reta jovaque, mbaeti ñandeYa jovaqueño.

²²Jare romondo jae reta jupíe iru orerivi vi. Jeta vese ma jae oicuauca oreve quirai jatangatu jeta mbaembae re. Jare añave jae jatangatu yae pererovia catu yae rambue. ²³Oime yave quia oparandu Tito re vae, pepuere pere jae co cheiru jare oparaviqui co che ndive ore pombori vaera. Ani oparandu yave iru orerivi reta re, pepuere pere oporogüirovia vae oñemboatiati vae reta omondo, jae jae reta omboeteuca co Cristo. ²⁴Jae rambue peicuauca chupe reta quirai peaiü. Jcorai yave, iru oporogüirovia vae oñemboatiati vae reta vi oicuaata, jare jcorai oicuaata añete co mbaembae icavi vae roe chupe reta peré vae.

Corepoti oñemboatita vae

9 ¹Tamombeu ye peve corepoti pemboatita vae re. Cuae corepoti rupi pepuereta pembori iru oñeño tee Tumpa peguara vae reta. Erei cuae peicuaa ma che aicuatía mbae reve. ²Che aicuaa quirai peipota yae peyapo cuae. Echa cuae re chemiari cavi peré Macedonia pegua reta pe. Che jae chupe reta quirai metei año ma peipota güire peporombori pe reta Acaya pe peico vae. Jare iru vae reta oendu yave quirai pe reta peipota peporombori, jae reta vi oipota oporombori. ³Erei amondo ma orerivi reta pepiri, agüiye vaera oremiarieño peré cuae re, jare pemocatiro voi penoi vaera corepoti, che jae ma rami. ⁴Güiramoi amogüe Macedonia pegua reta yogüirajata cherupíe, che aja yave pepiri. Jare mbaeti yave pemboati corepoti, jae reta oicuaa yave, oremarata. Echa roe chupe reta quirai pe reta peipota peporombori. Jae ramiño vi pe reta pemarata. ⁵Jae rambue añemongueta icavi co ayócuai vaera orerivi reta jae reta rani yogüiraja vaera pepiri. Jocorai jae reta ipuereta pembori opa vaera pemboati corepoti tenonde yave pere peipota pemee vae. Jare jocorai yave, che aja yave pepiri, oyecuaata quirai pemee peipiacavi rambue, mbaeti ore poócuai rambueño. ⁶Ñamojaanga omaeti vae mbaembae pemee vae re. Pemaendúa cuae re: Mboviño oñoti vae mboviño oarivota. Jare jeta oñoti vae jeta oarivota. ⁷Metei ñavo tomee iquirei reve oipota ome rami. Agüiye quia tomee jacatei reve ani che ayócuai rambueño. Echa Tumpa oaiu oyerovia reve ome vae. ⁸Jare Tumpa ipuere ome peve jeta mbaembae ipiacavi jeco pegua, agüiye vaera etei mbae oata peve, pe reta jecuaeño pepuere vaera peporombori opaete mbaraviqui icavi vae re. ⁹Echa Tumpa iñee pe oyecuatía oi corai: Jeta ome paravete vae reta pe.

Jupi vae oyapo vae re Tumpa jecuaecuae aveiño imaenduata.

Jocorai oyecuatía oi. ¹⁰Tumpa ome ñandeve ñaneremitira ñañoti vaera, jare ñaneremiura yau vaera. Jae ramiño vi omeeta peve opaete, pepuere vaera peyapo icavi vae, jare omovendiseta iru vae reta jupi vae peyapo vae rupi. ¹¹Jocorai pe reta penoita opaete mbaembae icavi vae, pepuere vaera jeta pemee. Jare ore rogüiraja yave iru vae reta pe pemeeta vae, jae reta omeeta yasoropai Tumpa pe. ¹²Echa peyeócuai yave Tumpa pe corai, pemeeta iru oñeño tee Tumpa peguara vae reta pe mbaembae oata chupe reta vae. Erei mbaeti cuaeño oyeapota. Echa corai peyapo yave, jeta vae omeeta yasoropai tuicha Tumpa pe. ¹³Jare peyeócuai yave Tumpa pe pemeeta chupe reta vae rupi, jae reta omboeteta Tumpa peré. Echa corai peicuaucata chupe reta quirai peyapo cuae icavi vae, ñee icavi vae Cristo regua perovia rambue. Jare jae reta omboeteta Tumpa jeta pemeeta chupe reta jare opaete vae pe vae jeco pegua. ¹⁴Jare jae reta oyerureta Tumpa pe peré, jare peraiuta Tumpa ipiacavi oyecuaa peré vae jeco pegua. ¹⁵Ñamee yasoropai Tumpa pe mbota jae ome ñandeve vae re. Mbaeti etei ñandepuere yaicuaa cavi cuae mbota.

Mbaepuere Pablo güinoi vae

10 ¹Che etei pomõnera cuae re. Cristo omee cheve añemomichi jare chepiaguasu vaera. Jae rambue chepuere pomõnera corai, yepe tei amogüe vae jei añemomichi yae pepiri ai rambueve erei mbaeti pepiri ai yave chemiari peve aquiye mbae reve. ²Erei che pomõnera cuae re. Echa mbaeti aipota cheñeengueta peve aja yave pepiri. Ereí añemongueta güiramoi icavi co cheñeengueta vaera amogüe pepite pe ñogüinoi vae pe. Echa jae reta oñemongueta tei ore roico oreremimbota reño. ³Erei yepe tei ore roico cuae ivi pe, erei mbaeti roiporu orembaepuere aeño roñoraro vaera aña guasu ndive. ⁴Echa ore mbaeti roñoraro orembaepuere ae peño. Ore roñoraro Tumpa imbaepuere tuicha vae pe, orepuere vaera romoamiri aña guasu, yepe tei imbaepuere tuicha co. ⁵Jocorai roicuauca mbaeti co añete oporogüirovia mbae vae reta iñemongueta jare opaete moromboe aña guasu oiporu agüiye vaera iru vae reta oicuaa Tumpa vae. Jare jocorai royapo opaete vae oñemongueta vaera Cristo oipota oñemongueta vaera rami. ⁶Jare jeta pe reta peñemongueta yave Cristo oipota peñemongueta vaera rami, aicavita ma ai aiporarauca vaera opaete mbaeti jocorai oipota oñemongueta vae reta pe.

⁷Pe reta pemboete iru vae reta mbae icatu pe oyecuaa vae re. Güiramoi quia oicuaa cavi jae co Cristo imbae. Ereí toicuaa cavi ore vi co jae Cristo imbae, jae rami. ⁸ÑandeYa omee oreve mbaepuere orepuere vaera pombori. Mbaeti omee oreve pomboavai vaera. Jare cuae mbaepuere rogüinoi vae jecuaeñotai co amboete. Ngaraa chemara jese. ⁹Jae rambue agüiye peñemongueta che aipota pomonguiye aicutía peve vae pe. ¹⁰Echa amogüe vae jei corai: “Pablo oicutía ñandeve vae pe jei ñandeve jeta mbaembae yavai vae yayapo vaera, jare oicutía mbaepuere güinoi vae rami. Ereí jae etei oi yave ñandepiri, oyecuaa quirai jae mbaeti etei mbaepuere güinoi, jare imiari yave, ñaroiro co”. Jocorai jei. ¹¹Erei jocorai jei vae toicuaa cuae: Roicuauca orembaepuere roicutía peve vae pe, mbaeti pepiri roi yave. Jae ramiño vi roicuaucata orembaepuere royapota vae pe, pepiri roi yave.

¹²Oime amogüe vae oñemboete vae. Mbaeti etei roipota roñemboyovaque jae reta ndive. Mbaeti vi roipota roe peve mbaraviqui ore royapo vae icavi yae co mbaraviqui jae reta oyapo vae güi. Jae reta mbaeti iyaracuaa. Echa oñejaa reta iñemongueta ae rupiño, jare jei reta mbaraviqui jae reta oyapo vae icavi yae mbaraviqui iñeiru reta oyapo vae güi. ¹³Erei ore ngaraa roe ore royapo metei mbaraviqui icavi vae, mbaeti yave royapo. Echa ore royapo mbaraviqui icavi vae Tumpa omee oreve royapo vaera vae. Jare Tumpa omaeño oreré royapo vaera mbaraviqui icavi vae pepite pe vi. ¹⁴Tumpa etei omee oreve mbaepuere cuae mbaraviqui royapo vaera. Mbaeti royavi. Añete co, royavita tei, mbaeti yave Tumpa omee oreve cuae mbaepuere. Jae rambue rojo ma pepiri romombeu vaera peve ñee icavi vae Cristo regua. ¹⁵Ngaraa etei roe ore royapo mbaraviqui icavi vae iru vae reta oyapo vae. Ereí roipota oñembotuicha vaera peporogüirovia. Jare

jocorai yave, pepuereta orembori jeta yae mbaraviqui orepuere vaera royapo, Tumpa oipota royapo vaera vae rupi, ¹⁶jare orepuere vaera romombeu ñee icavi vae iru tenta perenta cuti ñogüinoi vae reta pe. Echa mbaeti etei roipota roe ore royapo mbaraviqui icavi vae iru vae oyapo Tumpa jemimbota rupi vae.

¹⁷Erei oime yave quia oipota oporomboete vae, toamboete ñandeYa. ¹⁸Echa ñandeYa oamboeteuca vae oñemboeteucata co, mbaeti co jaeño oñemboete vae.

Pablo jare temimondo añetete mbae vae reta

11 ¹Aipota pepiaguasu vaera cheve, chemiari rambueve mbaeti iyaracuaa vae rami. Jae rambue pepiaguasu cheve. ²Añemoagüiro yae peré. Echa Tumpa ome cheve jocorai añemoagüiro vaera peré. Echa aipota pomee Cristo pe, metei cuñatai icavi vae ndeiño cuimbae güireco vae metei cuimbae ndive omenda yave oñemee ime pe rami. ³Erei añemongueta quirai güiramo petavita, agüiye vaera peñemongueta cavi Cristo re. Echa jocorai jocuae mboi ipoqui oporombotavi vaera vae ombotavi Eva. ⁴Echa ou yave pepiri quia ye Jesús regua omombeu peve vae, chupe pepiaguasu yae co, yepe tei jae mbaeti omombeu Jesús regua ore romombeu peve rami. Jae ramiño vi pepiaguasu yae co chupe jae omombeu peve yave pemboresive vaera iru espíritu tenonde yave Espíritu pemboresive vae güi oyoavi vae. Jae ramiño vi pepiaguasu yae co chupe jae omombeu peve yave iru ñee icavi vae tenonde yave ñee icavi vae perovia vae güi oyoavi vae. ⁵Erei che arovia jocuae temimondo tenondegua vae reta pe reta pere chupe vae mbaeti etei jeta oyapo Tumpa pe che ayapo vae güi. ⁶Yepe tei mbaeti chepoqui chemiari vaera, erei aicuaa catu chemiari peve jese vae. Jare jecuaño roicuauca cuae peve opaete royapo vae rupi.

⁷Amombeu peve yave ñee icavi vae Tumpa güi ou vae mbaeti etei mbae acovara peve mbae re. ¿Metei mbaeyoa ra ayapo peve? Echa che añemomichi ayapo vaera icavi vae peve. ⁸Amboresive iru oporogüirovia vae oñemboatiati vae reta güi corepoti agüiyeta tei amboresive chugüi reta vae. Echa jae reta omboepi cheve, chepuere vaera ayeócuai peve. ⁹Jare aico pepiri rambueve mbae oata cheve yave, mbaeti quia pepite pe amboavai chembori vaera. Echa ñanderivi Macedonia güi yogüeru vae reta güeru cheve mbae oata cheve vae. Jare jocorai aico, agüiye vaera pomboavai chembori vaera. Jare jecuae aicota jocorai. ¹⁰Ayerovia yae cuae re, jare jecuae chemiarita jese opaete Acaya rupi. Mbaetita quia ipuere chemoquirii. Echa Cristo oico chepia pe. Jae rambue aicuaa cuae che jae vae añete vae co. ¹¹Cuae mbaeti co oipota jei che mbaeti poaiü. Tumpa oicuaa poaiü co.

¹²Erei jecuaño ayapo vae jecuae ayapota co. Echa jocuae iru reta oipota yae tei oremboyovaque, ipuere vaera oñemboete. Erei corai jecuae ayapo yave, ngaraa ipuere. ¹³Jae reta mbaeti co temimondo añetete vae reta. Oparaviqui reta oporombotavi vaera. Jae reta oipota iru vae reta oñemongueta vaera jae reta co Cristo jemimondo reta. ¹⁴Jare agüiye ñanepiacañi cuae re. Echa Satanás etei ipuere oyepoepi, oyecuaa vaera metei araiqua tembipe pe oico vae rami. ¹⁵Jae rambue mbaeti co metei miacañi Satanás pe oyeócuai vae reta

oyepoepe yave oyecuaa vaera jupi vae oyapo vae reta rami. Erei taicue rupi Tumpa oiporaraucata chupe reta oyapo vae jeco pegua.

Pablo oiporara

¹⁶Cuae che jae ye peve: Agüiye quia toñemongueta che co jae mbaeti iyaracuaa vae. Erei jorai peñemongueta yave, pepiaguasu cheve metei mbaeti iyaracuaa vae pe pepiaguasu rami, che vi añemboete vaera michi pegua. ¹⁷Aicuaa cavi chepuere añemboete. Erei corai chemiari yave, chemiari ai metei mbaeti iyaracuaa vae imiari rami. Mbaeti co chemiari ai ñandeYa oipota chemiari vaera rami. ¹⁸Jeta vae oñemboete ñogüinoi jae retaiño oyapo vae re. Jae rambue che vi añemboeteta. ¹⁹Echa pe reta pepiaguasu peyerovia reve mbaeti iyaracuaa vae reta pe, pe reta peñemongueta pearacuaa co rambue. ²⁰Echa pepiaguasu pemombaraviqui tanta peyeócuai vaera chupe vae reta pe, jare pecorepoti omongata vae reta pe, jare pembotavi vae reta pe, jare pereroiro vae reta pe, jare oca perova re vae reta pe. ²¹Erei pe reta pere ore mbaeti co orepirata. Che jae peve añete co cuae oremboeco jese vae. Erei oime yave quia ipuere oñemboete vae, che vi chepuere añemboete. Añave chemiari ai mbaeti iyaracuaa vae imiari rami.

²²Jae reta jei: “Ore co jae hebreo reta”. Che jae vi co. Jare jei reta ye: “Ore co jae Israel pegua reta”. Che jae vi co. Jare jei reta ye: “Ore co jae Abraham iñemoña reta pegua”. Che jae vi co. ²³Jare jei reta ye: “Ore royeócuai Cristo pe”. Che ayeócuai yae Cristo pe chugüi reta. Chemiari ye ai mbaeti iyaracuaa vae imiari rami. Che aparaviqui tanta yae chugüi reta. Jeta vese iru vae reta chenupa chicote pe - mbaeti chepuere opa aipapa. Jeta vese añeñonouca tembipiiriru pe. Jeta vese amano seri. ²⁴Cinco vese judío reta chenupa chicote pe. Chenupa ñavo oiporu cheré treinta y nueve vese chicote. ²⁵Mboapi vese iru vae reta chenupa ivira pe. Metei vese cheapi reta ita pe. Mboapi vese buque aja i guasu rupi pipe vae oyeca. Metei vese apita i guasu pe etei metei pitu jare metei ara. ²⁶Jeta yae aguata opaete que rupi. I osiri vae reta aasa yave, chereraja seri. Oporopiaro vae reta oaro che aguataa rupi. Cherentaigua reta oyovaicho che ndive. Jae ramiño vi judío mbae vae reta oyovaicho che ndive. Amano seri tenta reta pe jare ñuu pe jare i guasu pe. Jare oporogüirovia-raanga vae reta oyovaicho che ndive. ²⁷Tanta aparaviqui aiporara reve. Jeta vese mbaeti aque cavi, cheñimbíai jare cheuve. Jeta vese oata cheve tembú, iroi cheve jare oata cheve temimonde.

²⁸Jare iru mbaembae ngaraa amombeu peve vae oyeapo cheve chemboavai vaera. Jare ara ñavo jeta yae añemongueta opaete oporogüirovia vae oñemboatiati vae reta re. ²⁹Oime yave quia mbaeti ipirata iporogüirovia re vae, che vi añemoiru jae ndive chepia pe. Oime yave quia iru vae omboavai vae, che vi chepochi jese. ³⁰Peipota yave añemboete vaera, añemboeteta co jocuae mbaembae mbaeti co chepirata

oicuaucua vae re. ³¹Tumpa oicuaa mbaeti etei cheapu ai. Jae co ñandeYa Jesús Tu. Opaete vae omboeteta jecuaecuae aveiño. ³²Damasco pe ai yave, Damasco pegua reta juvicha mburuvicha guasu Aretas jee vae pe oyeócuai vae oipota tei chepii. Jae rambue oyócuai sundaro reta oaro vaera opaete Damasco itaraquera reta. ³³Erei cheiru reta chembogüeyi metei canasta pe metei ventana Damasco iquesemba ita pegua vae pe oi vae rupi. Jare jocorai atecuarai Damasco pegua reta juvicha güi, agüiye vaera chepii.

ÑandeYa omeë ipiacavi Pablo pe

12 ¹Peipota añemboete vaera, yepe tei mbaeti co icavi añemboete vaera. Erei tamombeu peve quirai ñandeYa oehaucha jare oicuauca cheve mbaembae. ²Che co jae metei cuimbae Cristo re güirovia vae. Catorce año ma ayereraja güire ara ivate yae oi vae pe - ara mboapia yae chupe vae. Mbaeti aicuaa ojo ra cherete ani mbaeti ra ojo. Tumpaño oicuaa. ³⁻⁴Jare aicuaa quirai ayereraja paraíso pe, jare joco pe aendu ñee reta mbaeti jupi metei cuimbae oaa vaera vae. Tumpa mbaeti omaeño metei cuimbae re oaa vaera jocuae ñee reta. Mbaeti aicuaa ojo ra cherete ani mbaeti ra ojo. Tumpaño oicuaa. ⁵Añemboeteta tei cuae re. Erei ngaraa añemboete. Jaeño añemboeteta co jocuae mbaembae mbaeti co chepirata oicuauca vae re. ⁶Erei ngaraa chemiari mbaeti iyaracuaa vae imiari rami, yepe tei añemboete. Echa chemiarita tei añete vae re. Erei ngaraa chemiari jese, agüiye vaera quia chemboete yae jese. Echa aipota iru vae reta oñemongueta vaera mbae ayapo vae oecha vae jare cheporomboe oendu vae reño.

⁷Jeta vese ñandeYa oicuauca cheve mbaembae. Jare agüiye vaera añemboete yae cuae re, ou cheve metei mbaerasi chemambeco vaera. Chemambeco metei yuu ñandesoo pe oi vae ñanemambeco rami. Jocuae mbaerasi Satanás ombou cheve oiporarauca cheve vaera. ⁸Ayerure ñandeYa pe mboapi vese cuae mbaerasi re, opita vaera chegüi. ⁹Erei ñandeYa jei cheve corai: “Tamee ndeve chepiacavi remoaguata vaera. Echa nde mbaeti nepirata rambue, chepuere aicuauca quirai tuicha yae co chembaepuere”. Jocorai jei. Jae rambue ayerovia mbaeti chepirata rambue. Echa mbaeti chepirata rambue, Cristo omeë cheve imbaepuere. ¹⁰Añete co, mbaeti chepirata. Iru vae reta chereroiro. Mbaembae oata cheve. Iru vae reta oyapo icavi mbae vae cheve. Yavai yae aico vaera. Erei opaete cuae mbaembae oyeapo cheve yave Cristo pe ayeócuai rambue, ayerovia co. Echa che etei mbaeti chepirata yave, ñandeYa chemomirata.

¹¹Ayeapo ma metei mbaeti iyaracuaa vae rami añemboete vaera. Pe reta etei peipota jocorai ayapo vaera. Pe reta chemboeteta tei co. Echa jocuae temimondo tenondegua vae reta pe reta pere chupe vae mbaeti etei jeta oyapo Tumpa pe che ayapo vae güi. Chepuere jae cuae, yepe tei che etei mbaeti co mbae. ¹²Añete co, che aicuauca peve quirai che co jae metei temimondo añetete vae pepiri aico rambueve. Echa aparaviqui chepiaguasu reve. Ayapo miacañi reta peicuaa vaera. ¹³¿Maera pa peñemongueta che

mbaeti ayapo pepite pe iru oporogüirovia vae oñemboatiati vae reta ipite pe ayapo rami? Añete co, mbaeti pemboepi cheve jae reta omboepi cheve rami. ¿Peñemiro ra cheve cuae re? Jocorai yave, peiro cheve.

Pablo omombeu ojo yeta co Corinto pegua reta piri

¹⁴Mase, mócoi vese ma apou pepiri. Jare añave ayupavo ai, aja ye vaera pepiri. Jare ngaraa aipota pemboepi vaera cheve. Echa mbaeti aipota pecorepoti. Pombori vaeraño aipota. Che co jae peru rami. Icavi co tu ñavo oñovatu vaera mbaembae omeë vaera imichia reta pe. Mbaeti co yae michia reta pe jae reta oñovatu vaera mbaembae omeë vaera tu pe. ¹⁵Chequirei amongata chembaembae jare chequirei vi añemongata ayerovia reve chepuere vaera pombori. Yepe tei pe reta mbaeti cheraïu, erei che poaiu yae.

¹⁶Erei güiramoi amogüe vae jeita corai: “Añete co, Pablo mbaeti jei ñandeve ñamboepi vaera chupe. Erei jae ipoqui oporombotavi vaera. Ñanembotavi co”. Güiramoi jocorai jeita. ¹⁷Mbaeti etei che pombotaviuca jocuae amondo pepiri vae reta pe. ¹⁸Amoñera Tito ojo vaera pepiri, jare amondo jae jupíe iru ñanderivi. Tito mbaeti etei co pombotavi. Jae oyapo Espiritu Santo imbaepuere pe che ayapo vae rami.

¹⁹Güiramoi peñemongueta quirai añave oremiari corai royeepi vaeraño. Erei mbaeti jocorai. Oremiari corai Tumpa jovaque Cristo re rogüirovia rambue. Jare opaete royapo pe reta pepirata vaera peporogüirovia re. Echa ore poaiu yae. ²⁰Erei aja ye yave pepiri, añemongueta güiramoi aechata mbaeti peico che aipota peico vaera rami, jare güiramoi jocuae jeco pegua che ayapota pe reta ngaraa peipota ayapo vaera vae. Echa añemongueta güiramoi peyoacata oyoupi, peñemoagüirota oyoe, pepochita oyoupe, peñemboyaota oyougüi, peñoangaota, peñemboeteta, jare peñeenguetata oyoupe. ²¹Jae ramiño vi añemongueta güiramoi Tumpa omaeñota cheré chemara vaera peré, aja ye yave pepiri. Echa güiramoi chepiatiti yaeta jeta pepite pe ñogüinoi vae mbaeyoa oyapo vae re, mbaeti yave oyerova teco pochii vae güi, jare aguasa oyapo vae güi, jare mboquere oyapo vae güi.

Aracuaa reta jare tamaraeme reta

13 ¹Mócoi vese ma apou pepiri. Añave aja yeta pepiri. Oime yave quia teco oyapo vae, timiari mócoi ani mboapi oicuaa cavi jeco regua vae, yaicuaa vaera añete co. ²Amombeu ma peve taicue rupi pepiri aja yave, jare añave mbaeti pepiri ai, erei amombeu ye ai peve. Cuae aicutía opaete mbaeyoa oyapo vae reta pe jare opaete iru reta pe: Che aja ye yave pepiri, aiporaraucata co iyoa vae reta pe. ³Jocuae oicuaucata peve quirai Cristo imiari peve che rupi. Echa cuae peipota peicuaa. Jare Cristo mbaeti co ipuere mbae vae rami peré. Echa oicuauca peve imbaepuere. ⁴Echa yepe tei Cristo mbaeti mbaepuere güinoi vae rami co oyecutu curusu re yave, erei

oicove ye Tumpa imbaepuere rupi. Jae ramiño vi ore etei mbaeti mbaepuere rogüinoi, erei peicuaata quirai rogüinoi tecove ipiaü vae Cristo güi Tumpa imbaepuere rupi. Jae rambue rogüinoita co mbaepuere pepite pe.

⁵Jecuaño pemaë peyee peicuaa vaera pe reta jae ra co oporogüirovia vae añetete vae reta. Peicuaa co quirai Jesucristo oico pepia pe, pe reta co jae oporogüirovia vae añetete vae reta yave. ⁶Erei aipota peicuaa vaera ore co jae oporogüirovia vae añetete vae reta. ⁷Jare royerure Tumpa pe agüiye vaera peyapo mbae icavi mbae vae. Mbaeti roipota cuae, iru vae reta oñemongueta vaera ore royapo icavi vae. Jaeño roipota pe reta peyapo vaera icavi vae, yepe tei güiramoi iru vae reta oñemongueta ore mbaeti royapo icavi vae. ⁸Echa mbaeti rogüinoi mbaepuere royovaicho vaera añete vae ndive. Jaeño orepuere roñemoiru añete vae ndive. ⁹Pe reta pepirata yave peporogüirovia re, ore royerovia, yepe tei peñemongueta ore mbaeti co orepirata. Jare cuae re royerure: Tumpa tapemomirata yae peporogüirovia re. ¹⁰Jae rambue aicuatía peve corai mbaeti pepiri ai rambueve, agüiye vaera aiporu mbaepuere ñandeYa omeë cheve vae aiporarauca vaera peve pepiri aja yave. Echa ñandeYa omeë cheve jocuae mbaepuere pombori vaera, mbaeti aiporarauca peve vaeraño.

¹¹Jaeño ma, cherivi reta. Peyerovia. Peñemomirata peporogüirovia re. Peñombopiacatu. Peico cavi pepiacatu reve metei ramiño. Jare Tumpa etei oita pe ndive. Tumpa ñanderaiü jare ñanembopiacatu. ¹²Maraetei peyapo oyoupe yave, peñocuava peyoaiü reve. ¹³Opaete oñeño tee Tumpa peguara vae reta jei peve Tumpa ndiveño pei.

¹⁴ÑandeYa Jesucristo tomeë opaete peve ipiacavi. Tumpa tomeë opaete peve iporoaiü. Espíritu Santo tomeë opaete peve yerovia jae oñemoiru pe ndive rambue. Amén.